



REPUBLIKA E SHQIPËRISË

ENTI RREGULLATOR I ENERGJISË  
BORDI

VENDIM

Nr. 47, Datë 02.04.2024

MBI

**PËRCAKTIMIN E ÇMIMIT TË SHITJES SË ENERGJISË ELEKTRIKE NGA  
FURNIZUESI I MUNDËSISË SË FUNDIT PËR KLIENTËT E LIDHUR NË NIVELIN E  
TENSIONIT 20/10/6 KV PËR VITIN 2024**

Në mbështetje të neneve 16 dhe 87, pika 4 të ligjit nr. 43/2015 “Për sektorin e energjisë elektrike” i ndryshuar; “Metodologjisë së përcaktimit të çmimit të shitjes së energjisë elektrike nga furnizuesi i mundësisë së fundit”, miratuar me vendimin e bordit të Entit Rregullator të Energjisë (ERE) nr. 201, datë 04.12.2017, e ndryshuar si dhe nenit 15 të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; Bordi i ERE-s, në mbledhjen e tij të datës 02.04.2024, pasi shqyrtoi relacionin me nr. 739/1 prot., datë 29.03.2024, të përgatitur nga Drejtoria e Tarifave dhe Çmimeve “Mbi përcaktimin e çmimit të shitjes së energjisë elektrike nga furnizuesi i mundësisë së fundit për klientët e lidhur në nivelin e tensionit 20/10/6 kv për vitin 2024”,

**Konstatoi se:**

- Shoqëria “Furnizuesi i Shërbimit Universal” (FSHU) sh.a., me shkresën nr. 1246 prot., datë 29.02.2024, protokolluar me tonën me nr. 739 prot., datë 04.03.2024, ka paraqitur kërkesën për miratimin e çmimit të shitjes së energjisë elektrike për muajin janar 2024, për klientët FMF të lidhur në nivelet e tensionit 6/10/20 kV (klientë të rëndësisë së veçantë) që kanë dalë në treg të liberalizuar nga data 1 Janar 2022.
- Rezulton se çmimi i shitjes së energjisë elektrike për këtë kategori klientësh, i përllogaritur dhe i propozuar për miratim nga vetë shoqëria është 18.39 lekë/kWh. Në këtë çmim FSHU sh.a. ka përfshirë gjithashtu dhe zërin e kostove të disbalancave me arsyetimin e dhënë në vijim: “Duke qenë se sipas nenit 8 të “Metodologjisë së përcaktimit të çmimit të shitjes së energjisë elektrike nga Furnizuesi i Mundësisë së Fundit”, miratuar me vendimin nr.201, datë 04.12.2017, të Bordit të ERE-s, i ndryshuar, në çmimin e përllogaritur nuk parashikohen kostot e disbalancave, kërkojmë reflektimin e kësaj kostoje në çmimin e muajit Janar 2024”.
- ERE, me shkresën nr. 738/1 prot., datë 21.03.2024, ka sjellë në vëmendjen e shoqërisë FSHU sh.a. se: bazuar në nenin 87, pika 4 të ligjit nr. 43/2015 “Për sektorin e energjisë elektrike”, i ndryshuar, si dhe nenin 7, pika 1 të “Metodologjisë së përcaktimit të çmimit të shitjes së energjisë elektrike nga Furnizuesi i Mundësisë së Fundit”, miratuar me vendimin nr. 201/2017

të Bordit të ERE-s, e ndryshuar, çmimi i shitjes së energjisë elektrike nga FMF duhet të përfshijë vetëm kostot e identifikuar nga Furnizuesi, sipas përcaktimeve të kësaj metodologjie.

- Referuar VKM-së nr. 456/2022 “Për miratimin e kushteve për vendosjen e detyrimit të shërbimit publik që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji”, i ndryshuar, në nenin 5, pika 2, ndër të tjera përcaktohet se: “Furnizuesit të Shërbimit Universal, për të përmbushur kërkesat e klientëve që përfitojnë nga Shërbimi Universal i Furnizimit, në përputhje me parashikimet e pikës 1, të nenit 109, të ligjit nr. 43/2015, “Për sektorin e energjisë elektrike”, të ndryshuar, i vendoset detyrimi i shërbimit publik për të blerë sasinë e nevojshme të energjisë elektrike, të prodhuar nga shoqëria e prodhimit të energjisë elektrike, aksionet e së cilës kontrollohen nga shteti (shoqëria publike e prodhimit).
- FSHU sh.a. në aplikimin fillestar, të përcjellë me shkresën nr. 1246 prot., datë 29.02.2024, protokolluar me tonën me nr. 739 prot., datë 04.03.2024, ka bashkëlidhur gjithashtu korrespondencën e shoqërisë KESH sh.a. me nr. 457/1 prot., datë 19.02.2024, në të cilën sikurse parashikuar edhe në VKM-n nr. 456/2022, të ndryshuar, evidentohet se, KESH sh.a. në bazë të analizave për Programin Ekonomik Financiar të vitit 2024 dhe parashikimeve të periudhës 2025 - 2028, ka paraqitur në Këshillin Mbikqyrës projeksionet e veprimtarisë ekonomike të shoqërisë, për të cilat ky i fundit nëpërmjet vendimit nr. 03, datë 26.01.2024 miratoi Programin ekonomik - financiar të shoqërisë për vitin 2024 dhe parashikimin për vitet 2025 - 2028.
- Referuar të dhënave të korrespondencave të sipërcituara rezulton se çmimi mesatar i ponderuar për blerjen e energjisë elektrike për klientët FMF të lidhur në nivelin e tensionit 20/10/6 kV, për 2024 do të jetë 12.00 lekë/kWh.
- FSHU sh.a. në shkresën nr. 1245/2 prot., datë 27.03.2024, duke risjellë në vëmendje korrespondencën e sipërcituar të shoqërisë KESH sh.a., kërkon që për shkak se kostot e blerjes së energjisë elektrike për mbulimin e kërkesës së kësaj kategorie klientësh mbeten konstante përgjatë gjithë vitit 2024, të miratohet çmimi i shitjes së energjisë elektrike nga FMF për klientët e lidhur në nivelin e tensionit 20/10/6 kV (klientë të rëndësisë së veçantë) për vitin 2024.
- Në vijim, mbështetur në “Metodologjinë për përcaktimin e çmimit të shitjes së energjisë elektrike nga Furnizuesi i Mundësisë së Fundit”, miratuar me vendimin e Bordit të ERE-s nr. 201, datë 04.12.2017, e ndryshuar, paraqesim përlllogaritjen e kryer për përcaktimin e çmimit FMF për klientët e lidhur në nivelin e tensionit 20/10/6 kV. Komponentët e marrë në konsideratë janë:
  - **Tarifa e shërbimit të transmetimit të energjisë elektrike**, për periudhën 1 Maj 2022 – 31 Dhjetor 2024, e miratuar me vendimin e bordit të ERE-s nr. 72, datë 13.04.2022, është 0.85 lekë/kWh.

- **Tarifa e shërbimit të shpërndarjes në nivelet e tensionit 20/10/6 kV**, në zbatim të vendimit të bordit të ERE nr. 365, datë 15.12.2023, “Mbi lënien në fuqi të vendimit të Bordit të ERE-s nr. 73, datë 13.04.2022”, vijon të jetë 3.99 lekë/kWh.
- **Kostot administrative**, të cilat në zbatim të vendimit të bordit të ERE nr. 366, datë 15.12.2023, “Mbi lënien në fuqi të vendimit të Bordit të ERE-s nr. 74, datë 13.04.2022”, vijojnë të jenë 1.06 lekë/kWh.

Në zbatim të metodologjisë së sipërcituar si dhe bazuar në të dhënat e aplikimit, nga përlllogaritja e kryer nga ERE rezulton se çmimi i shitjes së energjisë elektrike nga Furnizuesi i Mundësisë së Fundit për vitin 2024, për klientët e lidhur në nivelin e tensionit 20/10/6 kV është si në tabelën e paraqitur më poshtë:

<i>Çmimi i energjisë elektrike të furnizuar nga Furnizuesi i Mundësisë së Fundit për klientët e lidhur në nivelin e tensionit 20/10/6 kV pëe Vitin 2024</i>			
	<b>Njësia</b>	<b>Çmimi</b>	
CBEt	Çmimi mesatar i ponderuar i blerjes së energjisë elektrike	Leke/kWh	12.00
Pr	Kthimi për riskun i përcaktuar në përqindje për vitin (3%)	Leke/kWh	0.36
CA	Kosto administrative të Furnizuesit të Mundësisë së Fundit	Leke/kWh	1.06
TRr	Tarifa e përdorimit të rrjetit të transmetimit	Leke/kWh	0.85
TSHt	Tarifa e përdorimit të rrjetit të shpërndarjes	Leke/kWh	3.99
<b>Çmimi i energjisë = CBEt +Pr* CBEt+ TRr+TSHt+CA</b>		<b>Leke/kWh</b>	<b>18.26</b>

Mbështetur në çdo element të formulës llogaritëse si dhe duke marrë në konsideratë të dhënat e paraqitura në aplikimet e shoqërisë, rezulton se çmimi i shitjes së energjisë elektrike të furnizuar nga Furnizuesi i Mundësisë së Fundit për klientët e lidhur në nivelin e tensionit 20/10/6 kV për vitin 2024 do të jetë 18.26 Lekë/kWh.

Për gjithë sa më sipër, bordi i ERE-s,

#### **Vendosi:**

1. Miratimin e çmimit të shitjes së energjisë elektrike të furnizuar nga Furnizuesi i Mundësisë së Fundit për periudhën 01.01.2024 – 31.12.2024, prej 18.26 Lekë/kWh për klientët e lidhur në nivelin e tensionit 20/10/6 kV.
2. Çdo ndryshim në elementët përbërës të çmimit të shitjes së energjisë elektrike të furnizuar nga Furnizuesi i Mundësisë së Fundit për klientët e lidhur në nivelin e tensionit 20/10/6 kV, do të përbëjë shkak për rishikimin e këtij vendimi nga Bordi i ERE-s.
3. Drejtoria e Tarifave dhe Çmimeve, të njoftojë aplikuesin për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARE NË DETYRË**

**Erjola SADUSHI**